

Aqqusinikkut angallannermut oqartussaaffiup pigisanullu nalilinnut inatsisip tiguneqarnissaanut tunngavissat tamarmik nassuiaasiorfigineqarnissaat siunertaralugu Naalakkersuisut Naalagaaffiup oqartussaasuinut saaffigineqqullugit peqquneqarnissaannik Inatsisartut aalajangiiffigisassatut siunnersuut.
(Inatsisartunut ilaasortaq Kuno Fencker, Siumut)

Akissuteqaat

(Ineqarnermut Attaveqaasersuutinullu Naalakkersuisoq)

Siullermeerneqarnera

Aallaqqaasiutigalugu Naalakkersuisut sinnerlugit Inatsisartut aalajangiiffigisassaattut siunnersuut, Inatsisartunut ilaasortamit Kuno Fencker-imit Siumumeersumit saqqummiunneqartoq pillugu qujavunga.

Namminersulernissap tungaanut sulinermi suliassaqarfinnik tigusiartuaarnissaq pingaarutilinnut ilaavoq. Suliassaqarfimmik tigusinermi tigusinissamut pisariaqartut aammalu tigusinissap kingunissai ilisimaneqartariaqarput. Taamaattumik tigusiartuaarnissamut pisariaqartut kingunerisassallu pillugit nassuiaasiornissaq alloriarnerni siulliusaaq.

2019-imi Siumut, Atassut, Nunatta Qitornai, Inuit Ataqatigiit aamma Demokraatit aningaasanut inatsimmi aalajangiippot, suliassaqarfinnik naalagaaffimmiit tigusiartuaarnissaq tiguisarnerillu tullerriaakkamik ingerlanissaat sulissutigineqassasoq. Tamanna tunngavigalugu Naalakkersuisut suliassaqarfinnik tiguneqarsinnaasunik misissueqqissaarluni sulianik ingerlataqarput. Suliaq taanna suli naammassinngilaq sulilu ingerlalluni.

Naalakkersuisut isumaqarput, oqartussaaffinnik tiguisarnerit paasissutissanik toqqammaveqarluartumik pisassasut. Suliassaqarfinni pissarsiassat annertunerunissaat, aammalu suliassaqarfiup tigunissaanut isumalluutissat Kalaallit Nunaanni pigineqarnissaat Naalakkersuisut pingaartippaat. Aqqusinikkut angallannermut oqartussaafik tamatumani ilaavoq. Siunissaq ungasinnerusoq eqqarsaatigalugu suliassaqarfiit, Naalakkersuisut suliassaqarfinnik sinneruttunik tigusinissamut ingerlaavartumik suliniutaanni tullerriinneqarsinnaasut tamarmik tigoqqarneqarnissaannik Naalakkersuisut pilersaaruteqarput.

Naalakkersuisut aamma pingaartippaat oqartussaaffiit tiguneqarnissaanni, nunatsinnut inuusaasitsinnullu aallaavilimmik tulluurtumillu tamakkua suliarineqarnissaat.

Aqqusinikkut angallanneq aamma nalilinnut inatsit suliassat tiguneqarsinnaasut ataatsimoortillugit misissuiffigineqarnerinut ilaatinneqarput. Suliassat aallartinneqareersut

eqqarsaatigalugit Naalakkersuisut isumaqarput, aalajangiiffigisassatut siunnersuut manna suliap matuma siuliani taaneqartup inaarsarneqarnissaanut iluaqutaasinnaasoq.

Taamaattumik aqqusinikkut angallannermik tigusinissaq pillugu nassuiaasiortoqarnissaa siunertaralugu Naalakkersuisut naalagaaffimmi oqartussaasunut attaveqarnissaat pillugu Naalakkersuisunit siunnersuuteqartoq isumaqatigineqarpoq.

Taamatut oqaaseqarlunga Naalakkersuisuniit siunnersuutip akuerineqarnissaa inassutigaarput.